



UNIVERSITÄTS-
BIBLIOTHEK
PADERBORN

Arbor Vitæ Sive Vita Et Doctrina Christi

Ex Quatuor Evangeliiis In Meditationes Quotidianas Velvti Totidem Ramos
Distributa

Illsung, Jakob

Dilingæ, 1693

Meditatio CCCCXVI. Parabola de Divisione Talentorum.

[urn:nbn:de:hbz:466:1-60727](https://nbn-resolving.org/urn:nbn:de:hbz:466:1-60727)

& stanti ante ostium, ac pulsanti non aperuit. Tu ergo, quandoquidem sæpe clamantem audis: *Aperi mihi Soror mea, Amica mea, Columba mea, Immaculata mea, quia Caput meum plenum est rore, & Cincinni mei guttis noctium.* Cant. 5. v. 2. Fac, ut dicere possis: *Surrexi, ut aperirem Dilecto meo, &c. Pessulum ostij mei aperui Dilecto meo &c. v. 5. & 6.*

MEDITATIO CCCCXVI.

Parabola de Divisione Talentorum.

Matth. 25. v. 14.


PUNCTUM I. Sicut homo peregrè proficiscens, vocavit servos suos, & tradidit illis bona sua. Considera, quomodo DEVS etiam te vocaverit, quàm suaviter, quàm efficaciter, & quanta tibi Bona tradiderit, id est, Media, & Auxilia ad ingentia Merita, ac Lucra Spiritualia tibi comparanda. Expende etiam, quàm liberaliter DEVS Servis suis Bona sua dividat, tribuens singulis, prout vult, non prout obligatur: unde contentus esse debes illis Bonis, quæ tibi tradidit; nec affligi, si quæpiam non tradidit: Dominus enim est, & de suis Bonis disponere potest, prout ipse vult. Unde *Vni dedit quinque Talenta, alij autem duo, alij verò unum, unicuique secundum propriam Virtutem.* Ex ultimis tamen verbis collige, DEVM in distribuendis suis Bonis attendere Servorum suorum *Propriam Virtutem*, nempe capacitatem, & dignitatem; unde nihil supra vires eorum ipsis committit, & simul etiam fervorum suorum dispositionem ac Merita exigit: quamvis enim primam Gratiam & multa Bona tribuat sine proprijs Meritis,

Meritis, ad multa tamen Bona tribuenda prærequirit propriam hominis dispositionem ac Merita. Stude ergo, ut dignus fias accipere quinque Talenta, & æmulare Charismata meliora.

PUNCT. II. *Abiit autem, qui quinque Talenta acceperat, & operatus est in eis, & lucratus est alia quinque. Similiter & qui duo acceperat, lucratus est alia duo. Sic quantò plura à DEO Talenta accepisti, tantò majorem conatum, & industriam debes adhibere ad faciendum majus lucrum: ipsaque Domini tui erga te liberalitas ad id incitamento tibi esse debet. Attamen, si minora & pauciora Talenta accepisti, noli animo deijci; Dominus enim contentus est, si quis Talents suis secundum vires suas, & secundum proportionem acceptorum Talentorum cooperatur, ut ex sequentibus patebit.*

PUNCT. III. *Post multum verò temporis (quod, etiam si alibi modicum & breve dicatur, comparatione videlicet Æternitatis secuturæ, absolutè tamen usque ad Extremum Diem Judicij, vel etiam Vitæ, multum dici potest) venit Dominus servorum illorum, & posuit rationem cum eis. Et accedens, qui quinque Talenta acceperat, obtulit alia quinque Talenta, dicens: Domine, quinque Talenta tradidisti mihi: ecce alia quinque super lucratus sum. Ait illi Dominus ejus: Euge Serve Bone & Fidelis, quia super pauca fuisti Fidelis, super multa te constituam: intra in Gaudium Domini tui. Accessit autem, & qui duo Talenta acceperat, & ait: Domine duo Talenta tradidisti mihi, ecce alia duo lucratus sum. Ait illi Dominus ejus: Euge Serve Bone & Fidelis, quia super pauca fuisti Fidelis, super multa te constituam, intra in Gaudium Domini tui. Considera, quantà Fiduciâ, Securitate, & Gau-*

dio hi Servi accesserint. Sic qui tempus vitæ, quan-
 tumvis longum, non otiosè & inutiliter transigunt, qui
 Auxilijs Gratiæ secundùm vires cooperantur, magnâ
 cum Fiduciâ, Securitate, & Gaudio ad Judicem ac-
 cedunt. Et tunc à DEO ipso laudantur, tanquam Bo-
 ni & Fideles Servi. Unde contempta laude humana,
 Divinam expectemus, sequentes illud Pauli monitum
 1. Cor. 4. v. 5. *Nolite ante tempus judicare (vel judicari)*
quoad usque veniat Dominus: qui & illuminabit abscondi-
ta tenebrarum (opera in occulto facta) & manifestabit
consilia cordium: & tunc laus erit unicuique à DEO. Non
 solum autem laudantur Fideles Servi, sed super omnia
 Bona Domini sui, per Visionem Beatificam, & Amo-
 rem Beatificum possidenda, constituuntur: & in ipsius
 Domini Gaudium (illud scilicet, quo ipse Dominus
 DEVS gaudet) Infinitum, Immensum, Æternum
 ex parte objecti & temporis, jubentur intrare: quod
 cum ipsi capere non possint, sed à Gaudio objecto ca-
 piantur, & toti obruantur; ideo non in ipsos Gau-
 dium intrare dicitur, sed ipsi intrare in Gaudium.
 Observa etiam eandem Laudem, & idem Præmium,
 iisdem verbis, duo tantùm Talenta lucranti attribui;
 quia, licet secundùm inæqualitatem Meritorum Præ-
 mia futura sint inæqualia accidentaliter, essentiali-
 ter tamen, (ut Theologi loquuntur) erunt æqua-
 lia; sicut alibi singuli Operarij in Vineâ Domini singu-
 los denarios diurnos accepisse dicuntur. Itaque con-
 tentus esto, si pauciora Talenta accepisti, modò
 illis cum proportione coope-
 reris.



MEDI-